



MEMORIA XUSTIFICATIVA

CONVENIO DE BASES REGULADORAS DA AXUDA OUTORGADA POLA A AXENCIA GALEGA DA CALIDADE ALIMENTARIA (AGACAL) Á FUNDACIÓN MONTE DO GOZO PARA MELLORAR A CAPACITACIÓN E REINSERCIÓN DOS MOZOS E MOZAS CON PROBLEMAS DE DROGADICCIÓN NA ACTIVIDADE AGRARIA (ART. 26 LEI 9/2007, DE 13 DE XUÑO, DE SUBVENCIÓNS DE GALICIA)

ANTECEDENTES

A AGACAL é unha axencia pública autonómica, creada polo Decreto 52/2018, do 5 de abril, que se encadra dentro das entidades instrumentais do sector público autonómico reguladas no título III da Lei 16/2010, do 17 de decembro, de organización e funcionamento da Administración xeral e do sector público autonómico de Galicia (LOFAXGA). En tanto que tal, está adscrita á Consellería do Medio Rural, ten personalidade xurídica propia, patrimonio e tesouraría propios e autonomía de xestión, nos termos establecidos na LOFAXGA. A norma de creación atribúelle, entre outras, a competencia para desenvolver as actividades de I+D+I e de formación nos sectores agrario, gandeiro e forestal. En particular, a Axencia ten a función de programar a formación agraria, nos seus aspectos de ensinanzas regradas e non regradas, tanto das persoas agricultoras, gandeiras e silvicultoras como das súas asociacións e agrupacións, así como daquelas persoas que queiran acceder no futuro á titularidade ou xerencia de calquera explotación agraria ou forestal; e de coordinar e facer o seguimento dos cursos de formación realizados no ámbito agrario.

A Fundación Monte do Gozo, como entidade sen ánimo de lucro, ten como obxectivo básico a atención gratuíta á mocidade marxinada. Nace e se mantén como un servizo desinteresado e solidario aos toxicómanos, as súas familias e á sociedade en xeral. Nesta liña, a Fundación Monte do Gozo está interesada en formar aos mozos e mozas beneficiarios en materias vinculadas á actividade agraria e silvicultura, en especial, naquelas que, a súa potencialidade supoña unha alternativa con proxección cara ao emprego rural.

O proxecto educativo-terapéutico lévase a cabo na Comunidade Terapéutica de Proxecto Home Galicia na que os usuarios permanecen en réxime de internado. Ten unha duración aproximada de 11 meses. Durante a súa estadía os usuarios non poden desenvolver ningunha actividade de tipo laboral xa que é incompatible co seu tratamento.

XUSTIFICACIÓN DA NON CONCORRENCIA

A AGACAL estima de interese público e humanitario a actividade da Fundación Monte do Gozo para ofrecer alternativas laborais e vitais, no ámbito agroalimentario, a persoas con dificultades asociadas á drogadicción. Así mesmo, esta actividade é coherente coas competencias estatutarias da Axencia, que persigue a incorporación de novos activos na actividade agroalimentaria galega. O orzamento da Axencia para 2023 dispón dunha partida nominativa en capítulo IV





destinada á Fundación Monte do Gozo. Doutra, o éxito acadado na recuperación das persoas nos últimos anos, xustifica a continuidade do apoio. En particular, a integración destas persoas no sector primario esixe da disposición de medios e infraestruturas de aprendizaxe. As prácticas de compostaxe son cada día máis demandadas na actividade vinculada á xardinaría e floricultura.

OBXECTO DO CONVENIO

O presente convenio formúlase como base reguladora dunha axuda directa concedida pola AGACAL á Fundación Monte do Gozo, de conformidade co artigo 19.4.a da Lei 9/2007, do 13 de xuño, de subvencións de Galicia e co Decreto 11/2009, do 8 de xaneiro, polo que se aproba o regulamento da Lei.

A axuda outorgada pola AGACAL ten como obxectivo mellorar as posibilidades formativas do Programa educativo terapéutico desenvolvido con mozos e mozas con problemas de drogadicción, en materias vinculadas á actividade agraria e silvicultura, en especial, naquelas na que, a súa potencialidade supoña unha alternativa con proxección cara ao emprego rural e incrementar as posibilidades de emprego das persoas beneficiarias.

Esta axuda concédese á Fundación Monte do Gozo, en base ao artigo 19.4.a da Lei 9/2007, para contribuír ao financiamento dos gastos de funcionamento do Programa educativo terapéutico desenvolvido na Comunidade Terapéutica de Cernadas, en materias como a iniciación á horticultura, fruticultura, cultivos intensivos baixo abrigo, instalacións para cultivo de horta e técnicas de rego, fertilización en invernadoiros e compostaxe. Esta formación debe incluír contidos teóricos e prácticos e será compatible coas esixencias propias do proxecto terapéutico, polo que se desenvolverá ao longo do ano 2023. Considéranse subvencionables as actividades formativas realizadas desde o 01/01/2023 ata o 31/10/2023. En tanto que subvención nominativa, esta axuda non precisa de fiscalización previa.

CONTÍA E FINANCIAMENTO

A liña de formación subvenciónase cun máximo de 27.766 €, para cobertura de gastos de funcionamento, dispoñibles na aplicación 14A2 422M 4811 proxecto contable 2011 00736.

PAGO

A axuda concedida poderá cubrir ata o 100 % do custe. As axudas son compatibles con outras subvencións, axudas, ingresos ou recursos para a mesma finalidade, sen que en ningún caso o importe conxunto percibido supere o custe da actividade subvencionada.

O pago realizarase trala comprobación da xustificación recibida. Non se prevé a realización de pagos anticipados. O prazo de xustificación das axudas remata o 15/11/2023. A xustificación presentarase telematicamente perante a AGACAL a través da Sede electrónica da Xunta de Galicia.





A Fundación Monte do Gozo xustificará a axuda mediante conta xustificativa que, incorporará os elementos previstos no artigo 48 do Decreto 11/2009, do 8 de xaneiro, polo que se aproba o regulamento da Lei de subvencións.

So se consideran subvencionables os gastos cuxa natureza responda indubidablemente á actividade subvencionada, segundo a descrición do texto do convenio, e efectivamente pagados con anterioridade á finalización do período de xustificación.

O director da Agacal
José Luis Cabarcos Corral

